



13.07.2018

Inatsisartut suleriaasianni § 37 imm 1 naapertorlugu Naalackersuisunut apeqqut imaattoq matumuuna saqqummiuppara.

Naalackersuisunut apeqqutit:

- 1. Naalackersuisuni ilisimaneqarpa, Royal Greenland-ip Maniitsumi talittarfiata kimmut isua tungaani, saarullinnik uumatitsiveqarneq immamilu mingutsitsivioqisumi tunisassiorneq ingerlanneqarnera?**
- 2. Naalackersuisunut apeqqutigerusuppara, apeqqut 1-imi avatangiisinut Naalackersuisoqarfimmi Kommuune-miluunniit akuersissuteqartoqarsimanersoq?**
- 3. Saarullinnik uumatillugit tunisassiorneq, iluatsilluartoq aalisartunut pingaaruteqaqisoq suliffissaqartitsilluartorlu, tunisassiornerup unittuunnginnissaa qulakkeerniarlugu, Naalackersuisuni qanoq pilersaarpat?**

(Inatsisartuni ilaasortaq Siverth K. Heilmann Atassut)

Tungavilersuut:

Maniitsumi aalisakkanut suliffissuit annersat ilaat, saarullinnik uumatillugit tunisassioriaaseq Royal Greenland-ip aalisartunik suleqateqarluarnermigut iluatsilluartutut oqaatigisariaqarpoq.

Bundgarn-ersornermi saarullit pisarineqartut Maniitsup kujataa tungaani uumatitsivinni ulluni marlussunni sanigorsarneqartarput, matumalu kingorna angallammiit suli uumatillugit fabrikkimut apuunneqartarlutik.

November 2017-imili uumatitsiviit apeqqummi imm 1-imiittumut inissinneqarsimasut paasigakku, ingerlaannaq aalisakkanik suliffissuarmi ningiuusumut siunnersortaasumullu saaffiginnippunga, arfiningorneq 11/11-2017 ataatsimeeqatigineranni paasitinneqarpunga, tunisassiorneq assartuinerlu pisariillisarumallugu, uumatitsivinnik inissiisimanertik umiarsualivimmut oqqullugit inissiinissaa siunissami atorussullugu siunniussimagitsik.

Taamatut siunniussaqaqarnerminni misilittakkat "Aquapri Årøsund"-imi Norge aallaaveqarneri oqaatigineqarput, tunisassiornerlu pitsaasumik kinguneqartarnera atorluarnissaa anguniagaalluni.

Ilimatitsissutigaara umiarsualivitta imartaa eqqaavissuatsinniik orsersortarfimmiillu maqitsinerit ulikkaartoornerillu kiisalu angallatit il il mingutsitsisarneq pisareersoq, assut suliffissuatta aalisartullu aningaasarsiorluarnerannut innarliisinaanera uvangaannaanngitsoq ernumatitsimmat.

Qulakkeerusulluinnarpara aalisakkanik suliffissuatta unittuunnginnissaa aammalu pisortat tungaanniit tunisassiornermi akuersissutit tamaasa pigineqarnissaat.

Naggataagut ilisimatitsissutigissavara, kommune-mi avatangiisinut atorfilittagut, ataatsimiititaliaq susassaartoq il il matuminnga paasitissimagakkit, tamarmilli ilisimasaqanngillat, avatangiisinut sunniutigisinnaasannik kingunipilugisinnaasaannillu qulakkeerisumik pisortatigoortumik saaffiginnissumik.

Neriullunga apeqquteqaatigalu ullut qullit suliffiusut iluanni akineqarumaartoq.